



Trg pravde 10, 76100 Brčko distrikt Bosne i Hercegovine; tel: 049/217-955; fax: 049/235-070; mail: pkbd@pkbd.ba  
Трг правде 10, 76100 Брчко дистрикт Босне и Херцеговине; тел: 049/217-955; факс: 049/235-070; е-пошта: pkbd@pkbd.ba

Broj: SuPK-00-714/23-I  
Brčko, 28.04.2023. godine

**Z A P I S N I K**  
**sa 246. sjednice Pravosudne komisije Brčko distrikta BiH**  
**održane 28.04.2023. godine, u 08,30 sati sa sljedećim**

*D n e v n i m   r e d o m*

1. Usvajanje zapisnika sa 245. redovne i 110. vanredne sjednice Pravosudne komisije Brčko distrikta BiH
2. Prijedlog Plana za borbu protiv korupcije Pravosudne komisije BD BiH 2022-2024. godina  
**(izvjestilac: Dejan Đurović)**
3. Prijedlog Pravilnika o izmjeni Pravilnika o ocjenjivanju rada službenika i namještenika u pravosuđu Brčko distrikta BiH  
**(izvjestilac: Dejan Đurović)**
4. Davanje saglasnosti na Pravilnik o izmjeni Pravilnika o sistematizaciji u Osnovnom sudu Brčko distrikta BiH  
**(izvjestilac: Dejan Đurović)**
5. Razmatranje radnog statusa pravobranioca i zamjenika pravobranioca u Pravobranilaštvu Brčko distrikta BiH  
**(izvjestilac: Dejan Đurović)**
6. Žalba M. S. od 11.04.2023. godine, izjavljena zbog ćutanja organa javne uprave  
**(izvjestilac: Dejan Đurović)**
7. Informacija o utvrđivanju liste reciprociteta u vezi sa sticanjem prava vlasništva na nekretninama  
**(izvjestilac: Dejan Đurović)**
8. Donošenje odluke o formiranju Radne grupe za izradu prijedloga Zakona o izmjenama i dopunama Zakona o stečaju BD BiH  
**(izvjestilac: Dejan Đurović)**
9. Imenovanje Komisije za odabiranje arhivske građe i izlučivanje bezvrijednog registraturskog materijala u Pravosudnoj komisiji Brčko distrikta BiH za 2023. godinu  
**(izvjestilac: Dejan Đurović)**
10. Imenovanje komisije za zapošljavanje po raspisanom javnom konkursu broj SuPK-01-514/23-III od 31.03.2023. godine  
**(izvjestilac: Dejan Đurović)**

11. Raspisivanje javnog konkursa za popunjavanje upražnjenih radnih mjesta u pravosuđu Brčko distrikta BiH  
**(izvjestilac: Dejan Đurović)**
12. Donošenje odluke o radnom vremenu za vrijeme državnih praznika Distrikta  
**(izvjestilac: Dejan Đurović)**
13. Donošenje rješenja o preuzimanju arhive notara Zorana Bogdanovića  
**(izvjestilac: Dejan Đurović)**
14. Prestanak radnog odnosa Danijeli Vilotić stručnom saradniku u Apelacionom sudu Brčko distrikta BiH  
**(izvjestilac: Dejan Đurović)**
15. Prestanak radnog odnosa Marini Blažević stručnom saradniku u Osnovnom sudu Brčko distrikta BiH  
**(izvjestilac: Dejan Đurović)**
16. Prestanak radnog odnosa Vesni Orlović, referentu-operateru-asistentu u Osnovnom sudu Brčko distrikta BiH  
**(izvjestilac: Dejan Đurović)**
17. Usvajanje izvještaja o realizovanoj edukaciji na temu „Profesionalni i etički standardi, integritet i dolično ponašanje“ i donošenje odluke o isplati naknade za održanu edukaciju edukatoru  
**(izvjestilac: Dejan Đurović)**
18. Verifikacija rješenja o izmjeni rješenja o imenovanju povjerenika broj: SuPK-06-417/23-III od 31.03.2023. godine  
**(izvjestilac: Dejan Đurović)**
19. R a z n o

#### PRISUTNI SU:

1. SAFET PIZOVIĆ, predsjednik Komisije,
2. MIRSAD ĆEMAN, potpredsjednik Ustavnog suda BiH, putem telefonske veze,
3. DAMJAN KAURINOVIĆ, predsjednik Apelacionog suda BD BiH,
4. ZEKERIJA MUJKANOVIĆ, glavni tužilac Tužilaštva BD BiH,
5. VELIBOR JAKIĆ, član Komisije iz reda građana,
6. MEHMED BEĆIĆ, član Komisije iz reda građana,
7. MILIVOJE VASIĆ, član Komisije iz reda građana.

Sjednica počela u 08,37 sati.

Konstatuje se da sjednici prisustvuje sedam članova, i da su opravdano odsutni članovi Komisije, Dragan Tomaš, predsjednik Osnovnog suda Brčko distrikta BiH i Ilinka Gavrić, pravobranilac u Pravobranilaštvu Brčko distrikta BiH, te da sjednici prisustvuje i sekretar Komisije Dejan Đurović.

Predsjednik Komisije otvara 246. redovnu sjednicu Pravosudne komisije sa predloženim dnevnim redom, s tim što predlaže da se na inicijativu pravobranioca u Pravobranilaštvu Brčko distrikta BiH sa dnevnog reda skine tačka broj 5. „Razmatranje radnog statusa

pravobranioca i zamjenika pravobranioca u Pravobranilaštvu Brčko distrikta BiH“, da se iza dosadašnje tačke 16. dodaju nove tačke 17. i 18. koje glase: „17. Zahtjev za sporazumni prestanak radnog odnosa Darka Antića, kurira u Osnovnom sudu BD BiH“ i „18. Razmatranje rang liste za izbor predsjednika Vijeća za izlaganje podataka o nekretninama i utvrđivanju prava na zemljištu u Odjeljenju za javni registar Vlade Brčko distrikta BiH“, te da se doda tačka 19. koja glasi: „Zahtjev Kenana Ibrahimovića za upis na listu stečajnih upravnika u Brčko distriktu BiH“.

Konstatuje se da su predložene izmjene i dopune dnevnog reda usvojene jednoglasno, bez primjedbi.

Slijedom predloženih dopuna i izmjena, numeracija tačaka se pomjera, tako da tačka Razno postaje tačka broj 21.

Prelazi se na prvu tačku dnevnog reda.

### **1. Usvajanje zapisnika sa 245. redovne i 110. vanredne sjednice Pravosudne komisije Brčko distrikta BiH**

Nakon razmatranja zapisnika, konstatuje se da su zapisnici sa 245. redovne i 110. vanredne sjednice Pravosudne komisije usvojeni jednoglasno, bez primjedbi.

### **2. Prijedlog Plana za borbu protiv korupcije Pravosudne komisije BD BiH 2022-2024. godina**

Nakon obrazloženja, konstatuje se da je Komisija jednoglasno usvojila Plan za borbu protiv korupcije Pravosudne komisije BD BiH 2022-2024. godina.

### **3. Prijedlog Pravilnika o izmjeni Pravilnika o ocjenjivanju rada službenika i namještenika u pravosuđu Brčko distrikta BiH**

Konstatuje se da je sjednici Komisije u 08,59 sati pristupio Dragan Tomaš, predsjednik Osnovnog suda Brčko distrikta BiH.

Konstatuje se da se predsjednik Komisije izuzima od odlučivanja po ovoj tački, a da sjednicom predsjedava Dragan Tomaš, predsjednik Osnovnog suda BD BiH.

Nakon obrazloženja i provedene diskusije, Komisija je jednoglasno usvojila Pravilnik o izmjeni Pravilnika o ocjenjivanju rada službenika i namještenika u pravosuđu Brčko distrikta BiH, u skladu sa slijedećim izmjenama i dopunama:

U članu 1. dodaje se novi stav (2) koji glasi:

„(2) Odredbe ovog Pravilnika ne primjenjuju se na nosioce sudskih i tužilačkih funkcija u pravosuđu, kao ni na pravobranioca i zamjenike pravobranioca i direktora Kancelarije za pravnu pomoć.“

Član 25. mijenja se i glasi:

„Član 25  
(Nagrađivanje službenika i namještenika)

(1) Rukovodilac pravosudne institucije može nagraditi službenika odnosno namještenika:

- a) koji je:
  - 1) dvije godine uzastopno ocjenjen ocjenom „nadmašuje očekivanja“ ili
  - 2) je njegov rad u posljednoj godini ocjenjen ocjenom „nadmašuje očekivanja“ i čiji je rezultat rada na osnovu utvrđenih ciljeva vrednovan ocjenom „ispunio utvrđene radne ciljeve“.
- b) za posebna zalaganja i rezultate u radu koji značajno doprinose uspješnosti rada pravosudne institucije u cjelini i njenom ugledu.

(2) Nagrađivanje iz stava (1) tačke b) ovog člana može se odrediti službeniku odnosno namješteniku ako je u periodu od najmanje tri godine prije nagrađivanja ispoljavanjem naročitog profesionalnog entuzijazma, inicijativnosti, inovativnosti i proaktivnosti dao značajan doprinos efikasnijem funkcionisanju pravosudne institucije, prepoznatljivosti na učvršćivanju vladavine prava i njenom ukupnom ugledu kroz:

- 1) kontinuirano praćenje i analizu stanja, te predlaganje i izradu adekvatnih normativnih, planskih i drugih rješenja iz nadležnosti pravosudne institucije;
- 2) izradu stručnih i naučnih radova, sticanje svojstva edukatora, učešće na naučnim i stručnim skupovima, okruglim stolovima, seminarima i sličnim aktivnostima u svojstvu uvodničara ili diskutanta po pozivu organizatora;
- 3) predstavljanje rada pravosudne institucije saglasno politikama javnog predstavljanja pravosudne institucije;
- 4) aktivno članstvo ili učešće u radu organa sindikata, profesionalnih udruženja i strukovnih udruženja;
- 5) izvršavanje drugih poslova ili aktivnosti od šireg značaja za funkcionisanje i ugled pravosudne institucije i vladavinu prava.

(3) Službenik odnosno namještenik može biti nagrađen jednom u tri godine.

(4) Nagrađivanje iz stava (1) ovog člana može se odrediti službeniku odnosno namješteniku ako postoje osigurana sredstva u budžetu pravosudne institucije za ovu namjenu i omogućava se u obliku:

- a) poklona u skladu s pravilnikom o poklonima i reprezentaciji u pravosuđu Brčko distrikta BiH ili
- b) novčane nagrade u iznosu do 10% njegove godišnje osnovne plate.

(5) Fond za nagrade u budžetu svake pravosudne institucije može iznositi maksimalno do 2% od iznosa ukupnih godišnjih neto plata službenika i namještenika te pravosudne institucije utvrđenih za budžetsku godinu.

(6) Vrsta i visina nagrade za rezultate u radu iz stava (1) tačke a) ovog člana utvrđuju se odlukom rukovodioca pravosudne institucije.

(7) Vrsta i visina nagrade za rezultate u radu iz stava (1) tačke b) ovog člana utvrđuju se odlukom rukovodioca pravosudne institucije, uz prethodnu saglasnost Pravosudne komisije.

(8) Rukovodilac pravosudne institucije, obavezan je da nakon provođenja ocjenjivanja dostavi na znanje izvještaj Pravosudnoj komisiji Brčko distrikta BiH o nagrađenim službenicima odnosno namještenicima, uz detaljno obrazloženje osnova za nagrađivanje i navođenje nagrađenih službenika odnosno namještenika.“

Ovako izmjenjen i dopunjen Pravilnik stupa na snagu danom donošenja i biće objavljen u „Službenim glasniku Brčko distrikta BiH“.

Konstatuje se da sjednicom ponovo predsjedava predsjednik Pravosudne komisije BD BiH.

#### **4. Davanje saglasnosti na Pravilnik o izmjeni Pravilnika o sistematizaciji u Osnovnom sudu Brčko distrikta BiH**

Nakon obrazloženja i provedene diskusije, Komisija je jednoglasno donijela sljedeću

##### **Odluku**

Pravosudna komisija Brčko distrikta BiH daje saglasnost na Pravilnik o izmjenama Pravilnika o unutrašnjoj organizaciji i sistematizaciji radnih mjesta u Osnovnom sudu Brčko distrikta BiH, broj: 096-0-Su-23-001590 od 14.04.2023. godine.

#### **5. Žalba M. S. od 11.04.2023. godine, izjavljena zbog ćutanja organa javne uprave**

Nakon obrazloženja, Komisija je jednoglasno donijela sljedeće

##### **Rješenje**

žalba M. S. od 11.04.2023. godine se odbacuje kao nedopuštena.

## **6. Informacija o utvrđivanju liste reciprociteta u vezi sa sticanjem prava vlasništva na nekretninama**

Nakon obrazloženja i provedne diskusije, Komisija jednoglasno donijela zaključak da Stručna služba Komisije za iduću sjednicu Komisije pripremi Listu reciprociteta u vezi sa sticanjem prava vlasništva na nekretninama u skladu sa istaknutim prijedlogom na sjednici.

## **7. Donošenje odluke o formiranju Radne grupe za izradu prijedloga Zakona o izmjenama i dopunama Zakona o stečaju BD BiH**

Nakon obrazloženja i provedne diskusije, Komisija je jednoglasno donijela sljedeću

### Odluku

I Formira se Radna grupa za izradu prijedloga Zakona o izmjenama i dopunama Zakona o stečaju Brčko distrikta BiH, u sastavu od:

1. Dobrinka Milivojević, sudija Osnovnog suda Brčko distrikta BiH, predsjednik,
2. Vuk Lučić, sudija Apelacionog suda Brčko distrikta BiH, član,
3. Merima Mujkić, stručni saradnik za pravne poslove i evropske integracije u Pravosudnoj komisiji BD BiH, član.

II Radna grupa je dužna svoj rad da organizuje u toku radnog vremena.

III Smjernice za izradu:

Prijedlog propisa utvrditi na način da se omogući polaganje stručnog ispita za stečajne upravnike pred Pravosudnom komisijom Brčko distrikta BiH, i propiše donošenje podzakonskog akta kojim će se regulisati postupak polaganja stručnog ispita. Takođe, prijedlogom propisa potrebno je ukloniti tehničke greške i nejasnoće koji su uočeni u osnovnom tekstu zakona od strane stečajnog sudije Osnovnog suda Brčko distrikta BiH i Stručne službe Pravosudne komisije. Prijedlog propisa utvrditi vodeći računa o zakonskim rješenjima iz ove oblasti na nivou entiteta u BiH, budući da je osnovni tekst Zakona rađen po uzoru na Zakon o stečaju Republike Srpske i prijedlog Zakona o stečaju Federacije BiH.

IV Rok za izradu: Radna grupa je dužna zadatak iz tačke III ove odluke završiti u roku od tri mjeseca odnosno do 28.07.2023. godine.

## **8. Imenovanje Komisije za odabiranje arhivske građe i izlučivanje bezvrijednog registratorskog materijala u Pravosudnoj komisiji Brčko distrikta BiH za 2023. godinu**

Nakon obrazloženja, Komisija je jednoglasno donijela sljedeću

Odluku  
o imenovanju Komisije za odabiranje arhivske građe i izlučivanje bezvrijednog  
registratorskog materijala u 2023. godini

### Član 1 (Predmet)

Ovom Odlukom imenuje se Komisija za odabiranje arhivske građe i izlučivanje bezvrijednog registratorskog materijala u Pravosudnoj komisiji Brčko distrikta BiH za 2023. godinu (u daljem tekstu: Komisija) u sljedećem sastavu:

1. Dejan Nišić, pomoćnik sekretara-portparol u Pravosudnoj komisiji - predsjednik;
2. Almira Pitnjaković, samostalni referent za finansije i računovodstvo - član;
3. Snježana Jokanović, službenik finansija i računovodstvene službe – član;
4. Nataša Kovač, sekretarica predsjednika/asistent – član;
5. Begzada Bečić, operater-asistent za opšte administrativne poslove – član;
6. Merisa Kevrić, operater-asistent za poslove personalne evidencije i zapošljavanja – član;
7. Branko Mišić, tehničar za informacione tehnologije – član.

### Član 2 (Zadaci Komisije)

Komisija je dužna da, u skladu sa Pravilnikom o kancelarijskom poslovanju Pravosudne komisije, Pravilnikom o arhivskom poslovanju Pravosudne komisije i Listom kategorija sa rokovima čuvanja Pravosudne komisije Brčko distrikta BiH, obavlja sljedeće poslove:

- a) vrši sređivanje i evidentiranje registratorskog materijala i arhivske građe koji su nastali u radu pravosudnih institucija prije formiranja Pravosudne komisije a koji se nalaze u posjedu Pravosudne komisije;
- b) vrši sređivanje i evidentiranje registratorskog materijala i arhivske građe koji su nastali u radu Pravosudne komisije Brčko distrikta BiH;
- c) vrši odabiranje arhivske građe i izlučivanje bezvrijednog registratorskog materijala;
- d) sačini detaljan popis bezvrijednog registratorskog materijala;
- e) provede druge radnje potrebne za uništavanje bezvrijednog registratorskog materijala i sređivanje arhivske građe u saradnji sa Arhivom Brčko distrikta Bosne i Hercegovine.

Član 3  
(Organizacija rada Komisije)

- (1) Komisija će svoj rad organizovati van radnog vremena u dane vikenda ili radnim danima nakon isteka redovnog radnog vremena u trajanju od 6 (šest) sati sedmično.
- (2) Za organizaciju rada Komisije zadužen je predsjednik Komisije.

Član 4  
(Evidencija o radu)

- (1) Komisija je dužna da o svom radu vodi evidenciju, koju dostavlja predsjedniku Pravosudne komisije Brčko distrikta BiH istekom svakog mjeseca ili ranije na njegov zahtjev.
- (2) Evidencija iz stava (1) ovog člana, koju svojim potpisom ovjeravaju predsjednik Komisije i predsjednik Pravosudne komisije, služiće kao dokaz ispunjenosti uslova za isplatu pojedinačne mjesečne naknade.

Član 5  
(Naknada za rad)

- (1) Za obavljanje zadataka iz člana 2. ove Odluke predsjednik i članovi Komisije imaju pravo na novčanu naknadu za rad van radnog vremena, shodno Zakonu o službenicima i namještenicima u pravosuđu Brčko distrikta BiH.
- (2) Novčana naknada iz stava (1) utvrdiće se kao mjesečna naknada u iznosu do 10% prosječne bruto plate zaposlenih u pravosuđu isplaćene za mjesec koji prethodi mjesecu u kojem se isplaćuje naknada.
- (3) Odluku o isplati novčane naknade istekom svakog mjeseca donosi predsjednik Pravosudne komisije Brčko distrikta BiH, srazmjerno efektivnom vremenu provedenom u radu uzimajući u obzir izvještaje o radu iz člana 4. ove Odluke.

Član 6  
(Stupanje na snagu)

Ova odluka stupa na snagu danom donošenja.



## **9. Imenovanje komisije za zapošljavanje po raspisanom javnom konkursu broj SuPK-01-514/23-III od 31.03.2023. godine**

Nakon obrazloženja i provedene diskusije, Komisija je jednoglasno donijela sljedeću

Odluku o imenovanju

Komisije za zapošljavanje po javnom konkursu broj: SuPK-01-514/23-I od 31.03.2023. godine

I Imenuje se Komisija za zapošljavanje stručnog saradnika u Osnovnom sudu Brčko distrikta BiH (na neodređeno vrijeme), u sastavu tri člana:

1. Dragan Tomaš, predsjednik,
2. Zekerija Mujkanović, član i
3. Damjan Kaurinović, član.

II Imenuje se Komisija za zapošljavanje stručnog saradnika u Osnovnom sudu Brčko distrikta BiH (na određeno vrijeme – radi zamjene odsutnog službenika), u sastavu tri člana:

1. Dragan Tomaš, predsjednik,
2. Zekerija Mujkanović, član i
3. Damjan Kaurinović, član.

III Imenuje se Komisija za zapošljavanje Sudskog policajca u Sudskoj policiji Brčko distrikta BiH (na neodređeno vrijeme), u sastavu tri člana:

1. Ivica Jurić, predsjednik,
2. Dejan Đurović, član i
3. Vedad Osmanović, član.

## **10. Raspisivanje javnog konkursa za popunjavanje upražnjenih radnih mjesta u pravosuđu Brčko distrikta BiH**

Nakon obrazloženja i provedene diskusije, Komisija je jednoglasno donijela sljedeću

Odluku

za raspisivanje javnog konkursa za popunjavanje upražnjenih radnih mjesta u pravosuđu Brčko distrikta BiH

1. Stručni saradnik u Apelacionom sudu Brčko distrikta BiH,  
(na neodređeno vrijeme) ..... 1 (jedan)  
izvršilac,
2. Stručni saradnik u Osnovnom sudu Brčko distrikta BiH,  
(na neodređeno vrijeme) ..... 1 (jedan)  
izvršilac,

3. Referent-operater-asistent u Osnovnom sudu Brčko distrikta BiH,  
(na neodređeno vrijeme) ..... 1 (jedan)  
izvršilac,
4. Radnik na održavanju-domar u Pravosudnoj komisiji BD BiH,  
(na određeno vrijeme, radi zamjene odsutnog službenika) ..... 1 (jedan)  
izvršilac,
5. Pripravnik u Kancelariji za pravnu pomoć Brčko distrikta BiH  
(na određeno vrijeme – do sticanja uslova za polaganje pravosudnog ispita, a najduže  
dvije godine) ..... 1 (jedan)  
izvršilac.

Prijave na konkurs podnose se od 05.05.2023. godine do 19.05.2023. godine.

## **11. Donošenje odluke o radnom vremenu za vrijeme državnih praznika Distrikta**

Nakon obrazloženja i provedne diskusije, Komisija je jednoglasno donijela sljedeću

Odluku o utvrđivanju skraćenog radnog vremena  
u pravosudnim institucijama Brčko distrikta BiH povodom praznika Brčko distrikta BiH za  
period april 2023. godine – januar 2024. godine

Ovom odlukom utvrđuje se skraćeno radno vrijeme u pravosudnim institucijama Brčko distrikta BiH u vrijeme praznika Brčko distrikta BiH, za period april 2023. godine do januara 2024. godine i to:

- Praznik rada – 28.04.2023. godine (od 07,30 do 13,30 sati) i
- Nova godina – 29.12.2023. godine (od 07,30 do 13,30 sati).

Ova odluka stupa na snagu danom donošenja.

## **12. Donošenje rješenja o preuzimanju arhive notara Zorana Bogdanovića**

Nakon obrazloženja, Komisija je jednoglasno donijela sljedeće

Rješenje

Satki Redžepović, notaru sa službenim sjedištem u Brčkom, ul. Bulevar Mira br. 22, Brčko distrikt BiH, koja je imenovana za notara rješenjem predsjednika Pravosudne komisije Brčko distrikta BiH, broj: SuPK-01-1040/22-IX od 24.01.2023. godine, nalaže se da u roku od 30 dana od dana prijema ovog rješenja od Pravosudne komisije Brčko distrikta BiH preuzme

arhivu notara Zorana Bogdanovića koji je trajno prestao sa radom zbog navršjenja 70 godina života.

Prilikom preuzimanja arhiva notara Zorana Bogdanovića, sačiniće se zapisnik između Prvosudne komisije Brčko distrikta BiH i notara Satke Redžepović.

### **13. Prestanak radnog odnosa Danijeli Vilotić stručnom saradniku u Apelacionom sudu Brčko distrikta BiH**

Nakon obrazloženja, Komisija je jednoglasno donijela sljedeće

Rješenje

Danijeli Vilotić, stručnom saradniku u Apelacionom sudu Brčko distrikta BiH, prestaje radni odnos po sili zakona zaključno sa 07.05.2023. godine, zbog imenovanja na drugu dužnost.

### **14. Prestanak radnog odnosa Marini Blažević stručnom saradniku u Osnovnom sudu Brčko distrikta BiH**

Nakon obrazloženja, Komisija je jednoglasno donijela sljedeće

Rješenje

Marini Blažević, stručnom saradniku u Osnovnom sudu Brčko distrikta BiH, prestaje radni odnos po sili zakona zaključno sa 07.05.2023. godine, zbog imenovanja na drugu dužnost.

### **15. Prestanak radnog odnosa Vesni Orlović, referentu-operateru-asistentu u Osnovnom sudu Brčko distrikta BiH**

Nakon obrazloženja, Komisija je jednoglasno donijela sljedeće

Rješenje

Vesni Orlović, referent-operater-asistentu u Osnovnom sudu Brčko distrikta BiH, prestaje radni odnos u Osnovnom sudu Brčko distrikta BiH, zaključno sa 09.05.2023. godine, na osnovu zahtjeva za sporazumni prestanak radnog odnosa.

## **16. Prestanak radnog odnosa Darku Antiću, kuriru u Osnovnom sudu Brčko distrikta BiH**

Nakon obrazloženja, Komisija je jednoglasno donijela sljedeće

### **Rješenje**

Darku Antiću, kuriru u Osnovnom sudu Brčko distrikta BiH, prestaje radni odnos u Osnovnom sudu Brčko distrikta BiH, zaključno sa 28.04.2023. godine, na osnovu zahtjeva za sporazumni prestanak radnog odnosa.

## **17. Rang lista sa preporukom za izbor kandidata na radno mjesto predsjednika Vijeća za izlaganje podataka o nekretninama i utvrđivanju prava na zemljištu u Odjeljenju za javni registar Vlade Brčko distrikta BiH**

Nakon obrazloženja i provedene diskusije, konstatuje se da je Komisija je jednoglasno u skladu sa odbredbom člana 38. stav (3) Zakona o službenicima i namještenicima Brčko distrikta BiH potvrdila izbor Milene Milinković, nakon provedene procedure za izbor predsjednika Vijeća za izlaganje podataka o nekretninama i utvrđivanju prava na zemljištu u Odjeljenju za javni registar Vlade Brčko distrikta BiH.

## **18. Usvajanje izvještaja o realizovanoj edukaciji na temu „Profesionalni i etički standardi, integritet i dolično ponašanje“ i donošenje odluke o isplati naknade za održanu edukaciju edukatoru**

Nakon obrazloženja, Komisija je jednoglasno donijela sljedeću

### **Odluku**

Nalaže se finansijskoj službi Pravosudne komisije Brčko distrikta BiH da na ime naknade za izvršenu edukaciju na temu „Profesionalni i etički standardi, integritet i dolično ponašanje“ održanu dana 11.04.2023. godine u Brčkom, edukatoru Mersudinu Pružanu tužiocu Tužilaštva Bosne i Hercegovine, isplati iznos od 552,51 KM (petstotinapedesetdvije KM i 51/100 KM) i na ime troškova prevoza iznos od 165,98 KM (stotinušezdesetpet KM i 98/100 KM), što ukupno iznosi 718,49 KM (sedamstotinaosamnaest KM i 49/100 KM).

## **19. Zahtjev Kenana Ibrahimovića za upis na listu stečajnih upravnika u Brčko distriktu BiH**

Nakon obrazloženja, Komisija je jednoglasno donijela sljedeće

### **Rješenje**

Kenan Ibrahimović, diplomirani ekonomista iz Brčkog, upisuje se na Listu stečajnih upravnika koju vodi Pravosudna komisija Brčko distrikta BiH.

Nalaže se Stručnoj službi Pravosudne komisije Brčko distrikta BiH da imenovanog upiše na Listu stečajnih upravnika.

## **20. Verifikacija rješenja o izmjeni rješenja o imenovanju povjerenika broj: SuPK-06-417/23-III od 31.03.2023. godine**

Nakon obrazloženja, Komisija je jednoglasno izvršila verifikaciju rješenja predsjednika Pravosudne komisije BD BiH, broj: SuPK-06-417/23-III od 31.03.2023. godine.

## **21. R a z n o**

Kako se više niko nije javio za riječ, 246. redovna sjednica završena je u 10,33 sati.

**Zapisnik vodila  
Nataša Kovač**

**Predsjednik  
Pravosudne komisije**

**Safet Pizović**

